

小山集

長沙劉瀚武子

桂殿秋 壽于湖先生

青帝子碧蓮宮不駕雲車騎白龍瑤池路  
遠羽衣濕玉佩泠泠明月中  
雙玉節到神京碧杯仙露冷如水一聲金  
磬千花發洞口天風吹酒醒

翠屏曲

小亭簾幕垂陰陰梅香入枕春生屏西窓

小山集

一





月落翠被冷鳥聲殘夢東風醒三年不喚  
清溪渡夢裏灑西春水路江頭女兒雙翠  
眉能唱劉郎芳草句

小宴

一曲歌雲勸玉觴歸來斜月恰侵床小窓  
細嚼梅花蕊吐出新詩字字香

余久客都城秋風思歸作楚語和  
吳郎採菱叩舷之音

秋風兮淒淒山中兮桂枝彈余冠兮塵墮  
芳草綠兮未歸家遲遲兮辭楚荆傷去國  
兮重登臨撫長劍兮增慨復鳴鋏兮成音  
採中洲兮蘭芷望美人兮千里我所思兮  
天一方共明月兮隔秋水

種梅

淒涼池館欲栖鴉綵筆無心賦落霞惆悵  
後庭風味薄負鋤明月種梅花

紅窓怨

啼鶯喚起紗窓夢落日滿簾花影弄翠屏

香字冷薰爐羅衣疊損金泥鳳去年君去  
燕歸時今日燕來君未歸欲把相思挑錦  
字夜寒懶上鴛鴦機起來翠袖香羅薄東  
風滿地桃花落

漁父

輕舟一葉一輕蓬上有蕭蕭雀髮翁昨夜  
不知何處宿月明都在笛聲中

春晚呈范石湖

風日蕭蕭兩鬢華倦尋銀筆賦餘霞五夏  
枕上無情雨三月風前薄命花春困有時  
因病酒客懷何日不思家年來事事心情  
懶惟有歸耕策最嘉

上元小亭

靖康詔令文章種桐邑公侯國老家種得  
人間桃李滿春風無地不開花

石頭城

離離荒草滿吳宮綠到臺城舊苑東一夜  
空江烟水冷石頭明月雁聲中



天上月

春冰一片淨無瑕  
萬里清光遍海涯  
欲與嫦娥移桂樹  
月中先合種梅花

春日

沉沉芳酌動金波  
笑引踈梅泛玉荷  
幾度天寒歸雁少  
一番風雨落梅多  
功名好在知心嬾  
富貴重來奈老何  
烏鵲數聲傳喜語  
梁間燕子亦能歌

江南曲

我家江南同野老  
自紡落毛采蘋藻  
清風滿袖讀離騷  
半畝幽畦種香草  
門前流水鳴濺濺  
日暮歸來自刺船  
遙山數疊作媚嫵  
落日斲霞明晚川  
雨餘汀草漲新綠  
紅衣濕盡鴛鴦浴  
採蓮女兒何處來  
唱我春風湖上曲  
瓮頭酒熟方新菊  
白魚如銀初上鉤  
呼兒洗杓醉明月  
酒酣更作商聲謳

鴻門宴

江邊遙遙八千騎  
大戰小戰七十二  
劉郎

曉鞭天馬來，蹙踏長安開。帝里子嬰已降，  
龍準公君王。置酒鴻門東，張良已去。玉斗  
碎，三月火照咸陽。紅繡衣歸來，日將夜可  
惜。雄心天不借，當時已失范增謀。尚引長  
戈到垓下，刁斗乍急營壘。驚夜深，旗尾秋  
風橫。玉帷佳人不成夢，月明四面聞歌聲。  
拔劍相看淚如雨，我作楚歌君楚舞。明朝  
寶馬一聲嘶，江北江東皆漢土。

玉斗歌

漢高帝真英主也。其入關則約法三章，封府庫，子女玉帛略無有所取。秦人歸心焉。不待白帝赤帝老嫗夜哭，然後知其爲天命也。彼姁姁項羽欲扼其吭而困之，難哉。鴻門之戰，沛公亦幾危矣。項莊舞劍，項伯翼蔽沛公，乃得從間道以歸。獨使張良謝羽，羽受其璧。此范亞父知其爲



虜所以慨然碎其玉斗也感之

作歌

漢兵咸陽未休舍楚王長歌到戲下項伯  
夜入張良營沛公倉皇出城謝自言戮力  
共攻秦不意入關成此勲閉關籍民備他  
盜盡封府庫待將軍項莊拔劍項伯起漢  
楚興亡在今爾鴻門壯士斬關來慷慨一  
卮誰懼死君不見秦亡鹿走驪山傾四方  
盡起諸侯兵龍顏隆準泗上長天之所授  
誰能爭英雄肯落他人手獨遣謀臣談辯  
口君王問道却歸來滿地秋聲鳴玉斗

吳門行

吳歌婉婉清如水西門曉自閶門起雙橈  
艇子採菱來翠苻綠蓓香十里芙蓉影落  
已知秋濺濕羅衣眉黛愁回聲蕩槳入門  
去明月家家秋水流

客去

送客歸來月滿簷梅花微笑隔疎簾酒醒

今夜銀屏冷沉水薰爐旋旋添

哀友人

按成歌舞小春嬌何事君隨草木彫從此  
巴江江上月有人和淚獨吹簫

聞笛

誰將玉笛按涼州吹徹春風不下樓若道  
聲聲都是恨不知消得幾多愁

小亭

芳草萋萋怨未歸西池殘夢要題詩綠窓  
昨夜東風小開遍梅花第幾枝

題飛雲閣

一笑歸來春尚寒小梅飄盡雪初殘遲遲  
更得梨花月醉倚飛雲十二闌

立秋日

亂鴉歸徹玉屏空一枕新涼一扇風睡起  
秋聲無覓處滿階梧葉月明中